

SOPRANO TICA GIEL DESTACANDO NA HULANDA



ORANJESTAD (AAN) - E destacado soprano Arubiana Tica Giel, tin 16 aña caba bibando na Hulanda, unda e ta desaroyando su cualidadnan vocalista masha hopi mes.

Den e dianan aki Tica ta di paso na Aruba, ya cu el bini canta pa motibo cu Santa Ana School a celebra su 100 aña di existencia, y ta unda Tica a siña. DIARIO a acerque no solamente pa motibo cu ta trata di un Arubiana cu ta destacando na Hulanda, pero tambe pa pidi e informacion tocante un proyecto riba tereno di canto na algun school Hulandes, unda cu Tica ta parti integral di dje.

Di con el a dicidi di bay Hulanda? Tica ta contesta di e manera aki: "Mi a bay Hulanda 16 aña pasa cu intencion di siña pa maestra di musica. Mi a bay na Januari aña 1977 y na Augustus di e mesun aña mi a drenta den e conservatorio di Alkmaar den e aña preparatorio. Eynan ainda e intencion tabata pa siña pa maestra di musica, pero di un of otro manera nan

a pushami den direccion di haya les di canto den e conservatorio.

E director di Conservatorio a scuchami ora mi a bay haci e prueba na Hulandes, y mesora el a dicidi cu mi lo bay siña canto profesional. For di mi di dos les caba un profesora a bisami cu mi tin cu siña canto pasobra mi tabata tin tur e cualidadnan necesario, cu mi mes a keda sorprendi cu esey", el a bisa.

Ademas di e aña preparatorio, Tica a studia canto durante cinco aña den e Conservatorio di Alkmaar, y despues di esey el a siña pa solista durante tres aña mas den e Conservatorio di Amsterdam, den e ramo di opera.

Den total el a studia nueve aña di canto.

PROYECTO NA HULANDA

Tica Giel ta envolvi den un proyecto relaciona cu opera como un expresion diferente cu mescos por envolver e presentacion vocal hunto cu gesto y cambio di voz, di un drama of comedia. Esaki ta tumando lugar actualmente den diferente school di musica na Hulanda. Kico e ta consisti di dje? Tica ta splica lo siguiente: "No ta algo unda mi mes ta actua directamente. Ta trata di un plan di guia pa maestronan di school di musica siña e muchanan kico opera ta, y pa nan bay wak opera como un expresion distinto. Como cu mi a studia opera, nan a pidimi pa mi clausura dicho proyecto akinan bishitando schoolnan cu tin diferente clas, cu ta bay wak e

opera. Loke mi tin cu haci ta conta di mi mes, di mi studio, y di mi canto den opera. Tambe canta pa nan hunga un rol chiquito pa nan por comprende cu tin diferente protagonista den opera, manera mi por hunga di un muher falso of un rol di un mucha muher timido of agresivo", el a splica.

Tica Giel a indica cu den opera e cantante ta usa su tecnica, pero na e momento di canta e voz ta cambia segun e personahe y e circunstancia cu esaki ta biba den e opera.

Den e proyecto pa mucha e ta canta un opera cu ta representa dos personahe opuesto na otro. Un personahe manera "E reina di anochi" cu ta un muher cu kier a usa su yiu pa lague mata un otro hende, loke ta haci di e protagonista un hende falso y agresivo, mientras cu su yiu cu ta un Princes tin un caracter masha suave cu no kier haci esey. Ta ambos personahe Tica mester representa unda cu por bisa su voz ta cambia segun e "cara di medaya" ta cambia den escenario. Esta e mama y e yiu.

Fuera di esey Tica ta canta cu e muchanan den coro, cu nan ta pone letra riba dje na Hulandes, y asina e ta realiza e papel di "popchi" particular di e muchanan, kendenan alavez ta tur soprano. Esaki ta tuma entre 3 pa 5 ora para dilanti un of otro clas, di e diferente gruponan.

E proyecto aki ta duna e muchanan un estimulo enorme pa despues nan mes tuma e iniciativa di bay un teatro presencia un opera ya cu nan tin conocimiento di kico e ta caba.